

四庫全書

子部

欽定四庫全書

子部

全芳備祖前集卷二

詳校官中書_臣寶汝翼

主事_臣祁韻士覆勘

總校官庶吉士_臣朱 鈐

校對官助教_臣卜維吉

謄錄監生_臣繆 瀛

欽定四庫全書

全芳備祖前集卷二

宋 陳景沂 撰

花部

牡丹

事實祖

碎錄

一名鹿韭 一名鼠姑

本草唐人謂之木芍藥 花譜洛人

謂穀雨為牡丹厄

司馬溫公姚黃註

論花者以牡丹為花王

楊誠齋

詩註

紀要

牡丹前史無說自謝康樂集中始言水間竹際多牡丹而北齊楊子華有畫牡丹極佳則知此花有之久矣但自隋以來文士集中無歌詩則知隋朝花藥中所無也隋種植法七十卷亦無牡丹名開元末裴士淹得之汾州天寶中為都城奇賞元和初猶少至貞元中已多與戎葵同矣

酉陽雜俎

自貞元始于汾州衆會寺宣取牡丹

薛能
詩序
開元間禁中初重木芍藥即今之牡丹也植

于興慶池東沈香亭前會花繁開明皇乘月夜召太真
妃以步輦從之詔選梨園子弟中尤者有樂工李龜年
以歌擅一時之名手捧檀板押衆樂將歌明皇曰賞名
花對妃子焉用舊樂遽命李龜年持金花箋宣賜翰林
李白進清平調詞三章白欣承詔旨猶苦宿醒未解援
筆賦曰雲想衣裳花想容春風拂檻露華濃若非羣玉
山頭見會向瑤臺月下逢一枝濃艷露凝香雲雨巫山

枉斷腸借問漢宮誰得似可憐飛燕倚新粧名花傾國
兩相歡長得君王帶笑看解釋春風無限恨沈香亭北
倚闌干龜年遽以詞進上令梨園子弟調撫絲竹從龜
年以歌聲震梁木太真妃持玻璃七寶盞酌涼州蒲萄
酒笑領歌意

開元天
寶遺事

高力士終以脫靴為恥因謂此

詩實譏妃子異日妃重歌前詞力士曰始謂妃子怨李
白入骨髓何乃拳拳于是妃曰何學士能辱人如斯力
士曰以飛燕指妃子賤之甚矣上欲命李白官卒為宮

中所扞而止

楊妃別傳

明皇時沈香亭前木芍藥一枝

二頭朝則深紅午則深碧暮則深黃夜則粉白晝夜之

內香艷各異帝曰此花木之妖也上賜國忠木芍藥國

忠以百寶為開

開元天寶遺事

問侍臣曰牡丹詩誰為好奏

云李正封詩曰國色朝酣酒天香夜染衣帝謂妃子曰

粧臺前飲一紫金盞酒則正封之詩可見矣

松憲錄

明

皇時有獻牡丹者謂之楊家紅乃楊勉家花時貴妃勻

面口脂在手印于花上詔于仙春館栽來歲花開上有

指印紅迹帝名為一捻紅

青瑣高議

明皇時民間貢牡

丹花面一尺高數寸帝未及賞為野鹿銜去有佞人奏

云釋氏有鹿銜花以獻金仙帝私曰野鹿遊宮中得貴

兆也殊不知應祿山之亂

青瑣高議

宋單父有種藝術

牡丹變易千種上皇召至驪山種花萬本色樣各不同

內人呼為花神又曰花師

異人錄

韓湘乃韓愈之姪孫

自言解造逡巡酒能開頃刻花愈曰子能奪造化而開

花乎湘乃聚土以盆覆之俄而舉盆有碧牡丹二朶葉

上小金字云雲橫秦嶺家何在雪擁藍關馬不前愈後
謫潮州到藍關遇雪乃悟又言染花紅者可使碧獻于
退之後堂之前染白牡丹一叢云來春為作金陵碧色
明年花開果如其說

太平廣記

富鄭公留守西京因府

園牡丹盛開召文潞公司馬端明邵先生是時牡丹一
欄凡數百本坐客曰此花有數乎且請先生筮之既畢
曰凡若干朵使人數如先生言又問曰此花幾時開盡
請再筮之先生再揲筮良久曰此花盡來日午時坐客

皆不答鄭公因曰來日食後可會于此以驗先生言坐
客曰諾次日食畢花尚無恙洎烹茶之際忽羣馬廐中
逸出與坐客馬相踉蹌奔出花叢中既定花盡毀折矣
于是洛中愈服先生之言

聞見錄

邵康節訪商守趙郎

中與章子厚同會議論縱橫不知敬康節洛人因及洛
中牡丹之盛趙請章曰先生生洛人也知花為甚詳康節
因言洛人以見根撥而知花之高下者上也見枝葉而
知高下者次也見落蕾而知高下者下也章默然

童蒙

訓

宋景文公初帥蜀彭州守朱君綽始取楊氏園花千品以獻公公在蜀四年每花時按其名往取彭州送花遂為公故事云此十品花尤愛重錦被堆嘗以之為賦

蜀志

東坡雨中作慶賞牡丹詩云霏霏雨霧作清妍

燦明燈照欲燃明日春陰花未老故應未忍著酥煎又云千花與百草共盡無妍鄙未忍汚泥沙牛酥煎落藥孟蜀時禮部尚書李昊每將牡丹花數枝分遺朋友以與牛酥同贈且曰俟花凋謝即以酥煎食之無棄濃艷

其風流貴重如此

後齊
設錄

雜著

圖玄瑞精有星而景有雲而卿其光下垂遇物流形草木得之發為紅英英之甚紅鍾于牡丹拔類邁倫國香欺蘭我研物情次第而觀暮春氣極綠苞如珠清露宵偃韶光曉驅動盪支節如解凝結百脈融暢氣不可遏兀然盛怒如將憤洩淑色披開照耀酷烈美膚膩體萬狀皆絕赤者如日白者如月淡者如赭殷者如血向者

如迎背者如訣圻者如語含者如咽俯者如愁仰者如
悅裒者如舞側者如跌亞者如醉曲者如折密者如織
疎者如缺解者如濯慘者如別初朧朧而下上次鱗鱗
而重叠錦衾相覆繡帳連接晴籠畫薰宿露宵裒或的
的騰秀或亭亭露竒或颭然如招或儼然如思或帶風
如吟或泣露如悲或垂然如縋或爛然如披或迎日擁
砌或照影臨池或山雞已馴或威鳳將飛其態萬萬胡
可立辨不窺天府孰從而見乍疑孫武來此教戰其戰

謂何搖搖纖柯玉欄滿風流霞成波歷堦重臺萬朶千
窠西子南威洛神湘娥或倚或扶朱顏色酡各盼紅粧
爭顰翠蛾灼灼天天逶逶迤迤漢宮三千艷列星河我
見其少孰云其多弄影呈妍壓景駢肩席發銀燭爐升
絳烟洞府真人會于羣仙晶瑩往來金釭列錢凝睇相
看曾不晤言未及行雨先驚早蓮公室侯家列之如麻
咳唾萬金買此繁華遑恤終日一言相誇列幄庭中步
障開霞曲廡重梁松篁交加如貯深閨似隔窻紗髣髴

息嬌依稀館娃我來觀之如乘仙槎脈脈不語遲遲日
斜九衢遊人駿馬香車有酒如澠萬坐笙歌一醉是競
莫知其他我按花品此花第一脫落羣類獨占春日其
大盈尺其香滿室葉如翠羽擁抱比櫛蓋如金屑粧飾
淑質玫瑰羞死芍藥自失夭桃無妍穠李慙出躑躅霄
潰木蘭潛逸朱槿灰心紫薇屈膝皆讓其先敢懷憤嫉
煥乎美乎后土之產物也使其花如此何其偉乎何前
則寂寞而不聞今則昌然而大來蓋草木之命亦有時

而塞亦有時而開吾欲問汝曷為生哉既緘口而不言

徒留玩以徘徊

舒元興賦

青陽既暮鳩鵲已鳴念蘭茗

之芳歇歎桃李之陰成惟翠華之艷煥傾百卉之光英

抽翠柯以布素粲紅芳而發榮

李德裕賦

高宗宴羣臣

賞雙頭牡丹賦詩上官昭容詩云勢如連璧友心似臭

蘭人一時稱之

異人錄

洛陽之俗大抵好花春時城中

無貴賤插花雖負擔者亦然花開時士庶競為遨遊往

往于古寺廢宅有池臺處為市并張幕席笙歌之聲相

聞最盛于月坡堤張家園棠棣坊長壽寺東街與郭令
家至花落乃畢洛陽至東京六驛舊不進花自今徐州
李相迪為留守時始進御歲差行役一員乘驛馬一日
一夜至京師所進不過姚黃魏紫花三數朶用菜葉實
竹籠子藉覆之使馬上不動搖以臘封花蒂乃數日不
落大抵洛人家家有花而少大者蓋不接則不佳也春
初時洛人于壽安山中斷小栽子賣城中謂之篋子人
家治地多畦塍種之至秋乃接接花尤工者謂之門園

子豪家無不邀之姚黃接頭直五千秋時立契買之至
春花乃歸其直洛陽人甚惜此花不欲傳其術權貴求
其接頭者或以醺殺與之魏花初出時接頭亦直五千
今尚直一千接時須用社後重陽前過此不佳也花之
本去地五七寸許截之乃接以泥封裏用軟土擁之以
弱葉作庵以罩之不令見風日惟南向留一小戶以達
氣至春乃去其覆此接花之法也用瓦亦可種花必擇
善地去舊土以細土用白蘆末一筋和之蓋牡丹根甜

多引蟲白蘖能殺蟲此種花之法也澆花亦有其時或
用日西或用日未出秋時旬日乃澆十月十一月至二
月間每日一澆此澆花之法也一本發數朶者擇其小
者去之止留一二朶謂之打剥恐分其脈也花纔落便
剪其枝勿令結子懼其易老也春初既去弱庵便以棘
數枝置花叢上棘氣煖可以避霜不損花芽此養花之
法也開漸小于舊者蓋蠹出損之必尋其穴以硫黃簪
之其旁又有小葉如針孔乃蟲所藏處花上謂之氣窻

以大針點硫黃末針之蟲乃死花復盛此醫花之法也
烏賊蟲骨用以針花樹入其皮花必死此花之忌

也

歐陽公洛陽風土記

牡丹出丹州延州東出青州南亦出

越州出洛陽者今為天下第一洛陽所謂丹州紅延
州紅青州紅者皆彼土之尤傑者然來洛陽纔得備衆
花之一種別第不出三以下不能獨立與洛花敵而越
花以遠罕識不見齒數雖越人亦不敢自譽以與洛陽
爭高下是洛陽者為天下第一也洛陽亦有黃芍藥緋

桃瑞蓮千葉李紅郁李之類皆不減他出者而洛陽人
不甚惜謂之菜子花曰某花云云至牡丹則不名直曰
花謂天下真花獨牡丹其名著不假曰牡丹而可知也
其愛重如此說者多言洛陽于三河間古善地昔周公
以尺寸考日出沒則知寒暑風雨乖與順于此取正此
蓋天下之中草木之華得中華之氣者多故獨與他方
異予以為不然夫洛陽于周所有之土四方入貢道里
均乃九州之中在天地崑崙磅礴之間未必中也又况

天地之和宜徧四方上下不宜限其中以氣自私夫中與和者有常之氣其推于物者亦宜為有常之形物之常者不甚美亦不甚惡及氣之病也美惡隔並而不相和入故物有極美與極惡者皆得于氣之偏也花之鍾其美與夫癭木臃腫之鍾其惡美惡之異是得一氣之偏也洛陽城數十里而諸縣之花莫及城中者出其境則不可植焉豈又偏氣之美者獨聚此數十里之地乎此又天地之大不可考也凡物不常有而為害于人者

曰灾不常有而徒可怪駭不為害者曰妖語曰天反時
為灾地反物為妖此亦草木之妖而萬物之一怪也然
比夫癭木臃腫者竊獨鍾其美而見幸于人焉余在洛
陽四見春天聖九年三月始至洛其至也晚見其晚者
明年會與友人梅聖俞遊嵩山少室維氏嶺石塘山紫
雲澗既還不及見又明年有悼亡之戚不暇見又明年
以留守推官歲晚解去只見其早者是未嘗見其極盛
時然目之所矚已不勝其麗焉余居府中時嘗謁錢思

公子雙桂樓下見小屏立坐後細字滿其上焉公指之
曰欲作花品此是牡丹名凡九十餘種余時不暇讀之
然余所經見而今人多稱者纔三十餘種不知思公何
從而得之多也計其餘雖有名而不著未必佳也故今
所錄但取其特著者而次第之

姚黃者千葉黃花出于民姚氏家此花之出于今未
十年姚氏居白司馬坡其地屬河陽然花不傳河陽
而傳洛陽洛陽亦不甚多一歲不過數朶錢思公嘗

曰人謂牡丹花王今姚黃真可為王而魏花乃后也
魏花千葉而紅始樵者得于壽安山中賣與魏相仁
溥家魏氏之館其池甚大傳者以花初開時有欲觀
者人十數錢乃得登舟至花落魏氏率得數十緡錢
牛黃亦千葉比桃差小真宗祠汾陰過洛陽留宴
淑景亭中牛氏獻此花在唐謂之御袍黃甘草黃單
葉色如甘草洛人善別花見其柎知其為某花獨甘
草黃易識其葉嚼之不腥

韎紅單葉深紅出青州亦名青州紅故僕射張齊賢
有第在西京自青州馳栽其種遂傳洛中其色類腰
帶故名韎紅

獻來紅其色淺紅大而多葉張僕射位相居洛有人
獻此花因名

添色紅其花多葉始開而白經日漸紅至謝乃深紅
此造化之尤巧者

鶴翎紅多葉內紅末白如鴻鵠羽

細葉粗葉壽安者千葉內紅出壽安縣錦屏山倒暈
檀心者多葉紅花凡花近萼色深至其末漸淺此花
自外深色近萼反淺白而深檀點其心此尤可愛
一捻紅者多葉淺紅花葉杪深紅一點如人以手指
捻之

九藥真珠紅千葉紅花止有一點白如珠密其葉蹙
其藥九叢

一百五洛陽花多葉白花洛人以穀雨開為候常至

一百五日方開因名

延州紅丹州紅醉妃紅亦名醉西施

蓮花萼多葉紅色青跗三重如蓮花萼

左花者千葉紫花葉茂而齊如截亦謂之平頭紫

硃砂紅者多葉紅色不知其所出有民門氏子者善

接花以為生買地于崇德寺前治花圃有此花洛陽

豪家尚未有故其名未甚著花葉甚鮮向日視之如

腥血

葉底紫其色如墨亦名墨紫花在叢中傍心生一大枝引葉覆其上其花紫開時可延十日之久唐中有宦者為觀軍容使花出其家亦謂之軍容紫

玉版白葉丹長如拍版之狀色如玉檀

潛溪緋潛溪寺在龍門山唐李蕃別墅本是紫花忽于叢中時出緋者一二朶明年花移他枝洛人謂之轉篆枝花其花緋色

鹿胎紫多葉紫花有白如鹿胎紋故相蘇尚圭家

間金紅韓維和范鎮蜀花圖詩云白豈容施粉紅須

陋間金

註云洛中有間金紅

右牡丹之名或以名或以氏或以州或以地或以色或旌其所異者而志之牡丹初不載大字惟以藥載本草然于花中不為高第大抵丹延已西及褒斜道中尤多與荆棘無異土人皆取以為薪自唐則天已後洛陽牡丹始盛然未聞有名著者如沈宋元白之流皆善詠花草計有若今之異者彼必形于篇詠而寂無傳焉惟劉

夢得有詠魚朝恩宅牡丹詩但云一叢千萬葉而已亦
不云其美且異也謝靈運言永嘉竹間水際多牡丹今
越花不及洛陽遠甚是洛花自古未有若今之盛也

歐陽

公牡
丹譜

予按白公集有白牡丹一篇十四韻又秦中吟十篇內
買花一篇凡百言云共道牡丹時相隨買花去一叢深
色花千戶中人賦而諷喻樂府有牡丹芳一篇三百四
十七字純道花之妖艷至有遂使王公與卿士遊花冠

蓋日相望花開花落二十日一城之人皆若狂之句又
寄微之百韻云唐昌王藥會崇敬牡丹期又惜牡丹詩
云明朝風起吹應盡夜惜衰紅把火看醉歸墊屋詩云
數日非關王事係牡丹花盡始歸來元微之有入永壽
寺看牡丹八韻白樂天秋題牡丹叢三韻酬胡三詠牡
丹一絕又有五言二絕句許渾亦有詩云近來無奈牡
丹何數十千錢買一窠徐凝之云三街九陌花時節萬
馬千軍看牡丹又云何人不愛牡丹花占斷城中好物

華然則元白未嘗無詩唐人未嘗不重此花也

賦詠祖

五言散句

帶花移牡丹

白樂天

葉薄風纔倚枝輕露不勝

李商隱

繁綠陰全合衰紅展漸難

元微之

紅樓金谷使芳澤洛川妃

梅鼎臣

簇藥風頻壞裁紅雨更新

元微之

國色朝酣酒天香夜染衣

李正封

濯水錦窠艷顏雲仙髻繁

宋祁

落日含明艷輕風襲煖香

王原父

艷絕百花態花中合面南

王內翰

照座千枝燭搖空九子鈴

王原父

向日檀心並承烟翠翰孤

夏英公

怨啼甄后土寒出貴妃湯

穆伯長

勢如連璧友心似臭蘭人

上官昭容

七言散句

平章宅裏一欄花

劉禹錫

天女竒姿雲錦裳

張耒

一枝香折瑞紅雲

韓忠獻

春殘獨自殿春芳

吳融

牡丹極用三春力開得方知不是花

司空圖

玉盤迸淚傷心數錦瑟繁絃破夢頻

李商隱

花時何處偏相憶寥落哀紅雨後香

元微之

冰肌玉骨鍾瓊萼雪魄蟾魂孕秀根

白樂天

霧重不勝瓊液冷雨餘惟見玉容低

年少曾為洛陽客眼明曾見魏家紅

歐陽修

白首歸來玉堂客君王殿後見靚紅

宿霧枝頭藏玉塊煖風庭面倒銀盃

葉底風吹紫錦囊宮爐應近更添香

梅鼎臣

金衣瑞羽迎風展琮栗仙盃壓霧斜

宋祁

應是吳宮歌舞罷西施因醉悞施朱

王內翰

盡日玉盤堆秀色滿城繡轂走香風

司馬光

節候初臨穀雨期滿天風雨助芳菲

蔡君謨

香澤最宜風靜處醉紅須在月明時

就中一叢何所似礪盤盛金縷盃

東坡

絕艷好將金作屋清香宜引玉飛錢

韓忠獻

花從單葉成千葉家住汝南疑洛南

陳穎賓

香濃得露久彌馥頭重迎風事不堪

先傳青帝開金屋欲送姚黃比玉真

風塵點污青春面自汲寒泉洗醉紅

黃山谷

浴泉秦虢流丹粉臨渚娥英冷佩衣

不誇西子錦為幄肯道太真雲想衣

如今眼底無姚魏浪蘊浮花懶問名

參寥

初起褪紅唇啟絳半沾斜綠眼橫波

劉巨濟

別有玉杯承露冷無人肯向月中看

裴璘

邀客定開瓊宴賞護春嘗把錦帷遮

宗貫之

曉來低面開檀口似笑窮愁病長官

王元之

天香未染蜂猶懶日幄先籠蝶已知

周益公

五言古詩

帝城春欲暮喧喧車馬度
共道牡丹時相隨買花去
家家習為俗人人迷不悟
有一田舍翁偶來賣花處
低頭獨長歎此歎無人喻
一叢深色花十戶中人賦

白樂天

前年題名處今日看花來
一作雲遊吏三見牡丹開
豈獨花堪惜方知老暗催
何況尋花伴東都去未回
誰知紅芳側春盡思悠哉

霧雨不成點，映空疑有無。時于花上見，的皪走明珠。芳

色洗紅粉，暗香生雪膚。黃昏更蕭索，頭重欲相扶。

東坡

明日雨當止，晨光在松枝。清寒入花骨，肅肅初自持。午

景發濃艷，一笑當及時。依然暮還斂，亦自惜幽姿。

幽姿不可惜，後日東風起。酒醒何所見，金粉抱青子。千

花與百草共盡，無妍鄙。未忍污泥沙，牛酥煎落蕊。

五言古詩散聯

壓砌錦地鋪，當軒日輪映。蝶舞香鬢飄，蜂牽蕊難正。籠

處彩雲合露湛紅珠瑩結葉影交加搖風光不定

元微之

芳叢列翠幃新苞吐香麝滿地方爭妍何花肯相下牡

丹持晚節羣芳甘共亞

程金紫

維揚千葉花到此三百里城中衆名園栽接比桃李

潁濱

五言絕句

綠艷閒且靜紅衣淺復深花心愁欲斷春色豈知心

王維

亂前看不足亂後眼偏明却將蓬蒿力遮藏見太平

鄭谷

今日花前飲甘心飲數盃但愁花有語不為老人開

劉禹

金
卷二
錫

傾國姿容別多開富貴家臨軒一賞後輕薄萬千花

古詩

城裏白員外城西賀秀才不愁家四壁自有錦千堆

東坡

風雨何年別留真向此邦至今遺恨在巧過不成雙

錦城春物異粉面瑞雲深賞愛難忘酒珍奇不貴金

韓子

華

仙娥裁巧樣彩筆費工深白豈容施粉紅須陋間金

韓持

國

齊
排日上牙牌記花先後開看花不予細過了却重回
誠楊

五言八句

壓徑更緣溝當窓復映樓終須一國破不費萬家求
鸞鳳戲三島神仙居十洲應憐萱草淡却得號忘憂
李商隱

賃宅得花饒初開恐是妖粉苞深紫膩肉色退紅嬌
且願風留看惟愁日炙銷可憐零落片留取作香燒
王建

數朶欲傾城安同桃李榮未嘗貧處見不似地中生比

物疑無價當春獨有名游蜂與蝴蝶來往自多情

張說

自古成都勝開花不似今徑圓三尺大顏色幾重深未

放香噴雪仍藏藥散金要知空相喻聊見至人心

范景仁

牡丹開蜀國盈尺莫如今妍麗色如衆栽培功倍深矜

誇傳萬里圖寫費千金難就朱欄賞徒然遠客心

范堯夫

五言律詩散聯

紅芳爭並萼湘葉競駢枝彩鳳雙飛穩霞冠對舞欹

夏英

公

天意偏應與春工已盡歸來如從月下去似逐雲飛艷

絕聲名遠清多香氣微

蔡君謨

殘花怨久病新雨泣餘妍不先雙旌出空令九陌遷

東坡

壓枝高下錦攢蘂淺深霞疊彩晞陽媚鮮苞照露斜

宋景

文

根深惟自庇香酷索人憐晚蘂仍晞日斜柯但倚烟

七言古風

牡丹芳牡丹芳黃金蘂紅玉房千片赤英霞爛爛百枝

絳艷燈煌煌照地初開錦繡段當風不結蘭麝囊仙人
琪樹白無色王母桃花紅不香宿霧輕盈泛紫艷朝陽
照耀生紅光紅紫二色間深淺向背萬態隨低昂映葉
多情隱羞面卧叢無力含醉粧低嬌笑容疑掩口凝思
怨人如斷腸穠姿貴彩信奇絕雜卉亂花無比方

白樂天

七言古詩

洛陽地脈花最宜牡丹尤為天下奇我昔所記數千種
于今十年皆忘之開圖若見故人面其間數種昔未窺

客言近歲花特異往往變出逞新枝洛人矜誇立名字
買種不復論家貲比新較舊難優劣爭先擅價各一時
當時絕品可數者魏紅窈窕姚黃肥壽安細葉開尚少
朱砂玉版人未知傳聞千葉昔未有只從左紫名初馳
四十年間花百變最後最好潛溪緋今花雖新我未識
未信與舊誰妍媸當時所見已云絕豈有更妍此可疑
古稱天下無正色但恐世好隨時移鞞紅鶴翎豈不美
鮮色如避新來姬何況遠征蘇與賀有類異世誇媿施

造化無情疑一概偏此著意何其私不疑人心愈偽巧
天欲開巧窮精微不然元化撲散久豈特今歲猶澆漓
爭新鬪麗若不已更後百世如何為但今新花日愈好

惟有我老年年衰

歐陽修

吉祥寺中錦千堆前年買花真盛哉道人勸我清明來
腰鼓百面如春雷打徹涼州花自開沙河塘上戴花回
醉倒不覺吳兒咍豈知如今雙鬢催城西古寺沒蒿萊
有僧閉門手自栽千枝萬葉巧剪裁就中一叢何所似

礪礪盤盛金縷盃而我食菜方清齋對花不飲花應猜

夜來雨電如李梅紅殘綠暗吁可哀

東坡

君不見沈香亭北專東風謫仙作頌天無功又不見君
王殿後春第一領袖衆芳捧堯日此花同春轉化鈞一
風一雨萬物春十分整頓春光了收黃拾紫歸江表天
香染就山龍裳餘芳却染水雲鄉青原白鷺萬松竹被
渠染作天上香人間何曾識姚魏相公斲移洛陽裔呼

酒先招野客看不醉花前為誰醉

楊誠齋

七言古風散聯

曲水亭西杏園北，穠芳深院紅顏色。
擢秀全勝珠樹林，結根幸在青蓮域。
艷蕊仙房次第開，含烟洗霞照蒼碧。

權德輿

君不見年年三月千叢媚，紫爛紅繁誇勝異。
尋常人戴

滿頭歸醉折狂分，不為貴

之王元之

姚黃魏紫腰帶鞶，潑墨齋頭藏綠葉。
鶴翎添色又其次

此外雖妍猶婢妾

歐陽修

擬王擬妃姚與魏歲歲年年千萬葉若將顏色定高低

綠珠雖美猶為妾

張文潛

鳥聲鳴春春漸融千花萬草爭春工紛紛桃李自撩亂
牡丹得體能從容雕欄玉砌升曉日輕烟薄霧應空濛

深紅淺紫忽爛熳如以蜀錦羅庭中

參寥

看花喜極翻愁人京洛久矣為胡塵還知魏姚輩何在

但有歐蔡名不泯

陳止齋

七言絕句

牡丹妖艷亂人心一國如狂不惜金帛若東園桃與李

果然無語自成陰

炙穀子

近來無奈牡丹何數十千錢買一窠今朝始得分明見

也共戎葵不較多

柳渾

平章宅裏一欄花臨到開時不在家莫道兩京非遠別

春明門外即天涯

張籍

往年君向東都去曾歎花時君未回今年況作東陵別

惆悵花前又獨來

白樂天四首

香勝燒蘭紅勝霞城中數令公家人人散後君須看
歸到江南無此花

白花淡泊無人愛亦占芳名道牡丹應是宮中白贊善
被人還喚作朝官

金錢買得牡丹栽何處辭叢別主來紅芳堪惜還堪悵
百處移來百處開

濃艷初開小藥欄人人惆悵出長安風流却是錢唐守

不踏紅塵看牡丹

張祐

花向琉璃池上生光風宛轉紫雲英自從天女盤中見

直至今朝眼更明

元微之

鶯澁餘聲絮墜風牡丹花盡葉成叢可憐顏色經年別

收取朱闌一片紅

庭前芍藥妖無格池上芙蓉靜少情惟有牡丹真國色

花開時節動京城

劉禹錫

既全國色與天香底用人家紫與黃却喜騷人稱第一

至今喚作百花王

長安豪貴惜春殘，爭賞新開紫牡丹。
別有玉盤承露冷，

無人起向月中看。

裴璘

小雨留春春未歸，好花隨看恐行稀。
勸君披取漁蓑去，

走看姚黃并濕歸。

司馬光

山村著書稱上藥，翰林弄筆作新歌。
人間朱粉無因學，浪把菱花省徧磨。

蟾精雪魄朶雲菱，春入香腮一夜開。
宿露枝頭藏玉塊，

煖風庭面搥銀盃。

歐陽修

人老簪花不自羞花應羞上老人頭醉扶歸路人應笑

十里珠簾半上鉤

東坡

仙衣不用剪刀裁國色初酣暈酒來太守問花花有語
為君零落為君開

春光冉冉歸何處更向尊前把一盃盡日問花花不語
為誰零落為誰開

一朵妖雲翠欲流春光回照雪霜羞化工只欲呈新巧
不放閒花得少休

花開時節雨連風，却向霜餘染爛紅。
滿地春光私一物，此心未信出天工。

當時只道鶴枝仙，能遣秋花發杜鵑。
誰信詩能回造化，直教霜折發春妍。

不分清霜入小園，放將詩律變寒暄。
使君欲見藍闌綠，更倩韓郎為染根。

正是風光懶困時，姚黃開晚落應遲。
欲將好句乞春色，日歷如山不到詩。

青春日月鳥飛迴汗簡文書山疊重乞取好花天上看
宮衣黃帶御爐烘

映日低風整復斜綠玉眉心黃袖遮大梁城裡雖罕見
心知不是牛家花

九疑山中萼綠華黃雲承轡到羊家真詮蟲蝕詩句斷
猶托餘情問此花

仙家襍積駕黃鵠草木無光一笑開人間風日不可耐
故待成陰葉下來

湯沐冰肥照春色銀蒜壓簾風不開直令紅塵無路入
猶待蜂鬚蝶翅來

春風晴晝起浮光玉作水膚羅作裳獨步世無吳苑艷

渾身天與漢宮香

石曼卿

西園春色纔桃李絳色成圍雪作團更欲開花比京洛
故將姚魏接山丹

去年歧路遇春殘滿院笙歌賞牡丹今歲杜陵千萬朵

却垂哀淚灑闌干

張芸叟

霜臺何處得奇葩分送天津小隱家初訝山妻思折取

尋常未慣插葵花

卽康節

小檻徘徊日自斜只愁春盡委泥沙丹青欲寫傾城色

世上今無楊子華

東坡

城西千葉豈不好笑舞春風醉臉丹何似後堂冰玉潔

遊蜂非意不相干

千里相逢如故人故栽庭下要相親明年一笑東風裏

山杏江桃不當春

張大潛

露稀春晚到春叢拂掠殘粧可意紅多病廢詩仍止酒

可憐雖在與誰同

山谷

不管鶯聲向晚催錦衾春晚尚成堆香紅若解知人意

睡取東君不放回

韓忠獻

棗花至小能結實桑葉雖柔可作絲堪笑牡丹如斗大

不成一事又空枝

王丈康

香玉封春未啄花露根烘曉見纖霞自非水月觀音樣

不稱維摩居士家

朱淑真

綠葉滿園風雨餘君家花事嶺中無眼明見此還三歎

京洛名園憶上腴

張南軒

姚魏從來洛下誇千金不惜買繁華今年底事花能賤

緣是宮中不賞花

徐惠

春工彈巧萬華叢晚見昭儀擅漢宮可惜芳時天不惜

三更雨歇五更風

程滄洲

落日賓朋醉帽斜笙歌一曲上雲車頗知春色隨軒去

不見東庵滿檻花

張無盡

縹葉湘叢照碧欄
幾春都未見殷鮮
栽培不得華腴地

豈是東君用意偏

石舍人

七言律詩

香勝燒蘭紅勝霞
開時比屋事豪奢
買栽池館恐無地
看到子孫能幾家
門倚長衢聯綺輦
幄籠輕日護香紗
歌鐘只解人歡賞
豈信流年鬢易華

羅鄴

似共東君別有情
絳羅高卷不勝春
若教解語應傾國
任是無情亦動人
芍藥與君為近侍
芙蓉何處避芳塵

可憐韓令功成後辜負穠華過此身

羅隱

幸自同開俱隱約何須相倚闌輕盈凌晨併作新粧面
對客偏含不語情雙燕無機還拂掠遊蜂多思正經營

長年是事皆拋盡今日欄邊暫眼明

韓愈

錦幃初卷衛夫人繡被猶堆越鄂君垂手亂翻雕玉佩
折腰爭舞鬱金裙石家蠟燭何曾剪荀令香爐可待熏

我是夢中傳彩筆欲書花葉寄朝雲

李商隱

真宰無私煦嫗同洛花何事占全功山河勢勝帝王宅

寒暑氣和天地中盡日玉盤堆秀色滿城繡轂走春風

謝公高興看春物倍憶清伊與碧嵩

司馬溫公

東皇封作萬花王更賜珍華出尚方白玉堆將青玉緣
碧羅領襯翠羅裳古來洛口元無種今幸天心別得香

塗改歐家記文省此花未出說姚黃

楊誠齋

病眼看書痛不勝落花千朵喚雙明淺紅釀紫各新樣

雪白鶯黃非舊名擡舉精神微雨過留連消息嫩寒生

蠟封水養松窓底未似雕欄倚半醒

楊誠齋

紫玉盤盛碎紫綃紫綃擁出幾姣饒都將些子鬱金粉
亂點中央花片梢葉葉鮮明還互照枝枝風韻不勝妖
折來細雨輕寒裏正是東風折半苞

楊誠齋咏重
臺九心淡紫

七言律詩散聯

閒來吟繞牡丹叢花艷人生事畧同半雨半風三月內

多愁多病百年中

杜荀鶴

上苑他年未可追西州今日忽相期水亭暮雨寒猶在

羅薦春香煖不知

李商隱

千葉繁紅吐異芳中央瑞色藹清香密攢鶯羽參差折

細雨霓裳次第黃

夏英公

漢廟名園甲潁昌洛川珍品重姚黃雨餘往看初疑曉

春盡方開自不忙

潁濱

千重紫繡擎熏炷萬葉紅雲砌寶冠直抱翠容持玉笋
滿將春色上金盤魏花一本須稱后十朵齊開面曲欄

樂府祖

夜合花

百紫千紅占春多少共推絕世花王西都萬家侯好不
為姚黃謾腸斷巫陽對沉香亭北新妝記清平調詞成
進了一夢仙鄉天葩秀出無雙倚朝暉半如酣酒
成狂無言自有檀心一點偷芳念往事情傷入新艷
曾說河陽縱歸來晚君王醒後別是風光

晁无
咎

剪朝霞

本名鵲
鵲天

曾弄輕陰穀雨乾半垂雲幕護殘寒化工著意呈新巧
剪刻朝霞飮露盤輝錦綉掩芝蘭開元天寶盛長安

沈香亭子鈎欄畔偏得三郎帶笑看

賀方回

蝶戀花

燕子來時春未老紅蠟團枝費盡東君巧
烟雨弄晴芳意惱雨餘特地殘粧好
斜倚青樓臨遠道不管傍人密共東君笑
都見嬌多情不少丹青傳得傾城貌

王道輔

玉樓春

雲橫水遶芳塵陌一萬重花春拍拍藍橋仙路不崎嶇
醉舞狂歌容倦客真香解語人傾國知是紫雲誰敢

覓滿蹊桃李不能言分付仙家君莫惜

范石湖

杏花天

牡丹比得誰顏色似宮中太真第一漁陽鼙鼓邊風急
人在沈香亭北買栽池館知何益莫虛把金梭拋擲
若教解語傾人國一箇西施也得

稼軒

鷓鴣天

翠蓋牙籤幾百株楊家姊妹夜游初五花結隊香如霧
一朶傾城醉未蘇閒小立困相扶夜來風雨有情無

愁紅慘綠今宵看却似吳宮教陣圖

濃翠深黃一畫圖中間更著玉盤盂
先裁翡翠裝成蓋更點胭脂染透蘇
香灑灑錦模糊美人長得醉工夫
莫攜玉手欄邊去羞得花枝一朵無

占斷雕欄只一株春工費盡幾工夫
天香夜染衣猶濕國色朝酣酒未蘇
嬌欲語巧相扶不妨老幹自扶疎
恰如翠幄高堂上來看紅衫百子圖

洛浦風光爛熳時千金開宴醉為期
花方著雨猶含笑

蝶不禁寒總是癡 檀暈吐玉華滋不隨桃李競春非

東君自有回天力看把花枝帶月歸

李橋山

點絳脣

庭院深深異香一片來天上傲春遲放百卉皆推讓憶

昔西都姚魏聲名堪惆悵醉翁何往誰與花標榜

王梅溪

朝中措

華堂欄檻古韶光端不負年芳依倚東風向晚數行濃
淡仙粧 停盃醉折多情多恨絕艷真香只恐去為雲

雨夢魂時惱襄王

曾海野
應制作

定風波

上苑穠芳初雨晴香風嫋嫋泛軒楹猶記洛陽開小宴
嬌面粉光依約認傾城流落江南重此會相對金蕉
蘸甲十分傾怕見人間春更好向道如今老去尚多情

普海
野

臨江仙

玉宇暖清禁曉丹葩色照晴空珊瑚敲碎小玲瓏人間

無此種來自廣寒宮 雕玉闌干深院靜嫣然頻笑西

風曲屏須占一枝紅且圍歌醉枕香到夢魂中

張村甫

如夢令

一晌園林綠就柳色鶯聲遠透輕煖與輕寒又是牡丹
時候時候時候歲歲年年人瘦

吳履齋

昭君怨

曾看洛陽舊譜只許姚黃獨步若比廣陵花大虧他

舊日王侯園圃今日荆榛狐兔君莫說中州怕他愁

劉後

村

六州歌頭

維摩病起兀坐等枯株
清晨裏誰來問是文殊
遣名姝
奪盡羣花色浴纔出醒
初解千萬態嬌無力困
相扶絕
代佳人不入金張室
却訪吾廬對茶鐺
却榻笑殺此翁
癯瑤砌金壺始消渠
憶昇平日繁華事
修成譜寫成
圖奇絕甚歐公記蔡公書
古來無自京華隔問姚魏
竟何如多應是彩雲散
劫灰餘野鹿銜將去休
回首河洛

丘墟謾傷春弔古夢繞漢宮都歌罷欵歔

後村

漢宮春

花姚來時帶天香國艷羞掩名姝日長半嬌半困宿酒
微蘇沈香檻北比人間風異烟殊春恨重盤雲墜髻碧
花番吐瓊盃洛苑舊移仙譜向吳娃深館曾奉清娛
猩唇霞紅未洗客鬢霜鋪蘭池沁碧過西園重載雙壺
休謾道花扶人醉醉花却要人扶

吳夢窗

大酺

正綠陰穠鶯聲懶庭院寒輕烟薄天然花富貴逞妖紅
殷紫疊葩重萼醉艷酣春妍姿挹露翠羽輕明如削檀
心鶯黃嫩似離情愁緒萬絲交錯更銀燭交輝玉瓶微
浸宛然京洛朝來風雨惡怕僂僂低張青油幕便好
倩佳人挿帽貴客傳箋趣良辰賞心行樂四美難并也
須拚醉莫辭盃酌被花惱情無著長笛何處一笑江頭
高閣極目水雲漠漠

趙虛齋

蝶戀花

三疊闌干鋪碧甃
小雨新晴纔過清明候
初見花王披
袞繡嬌雲瑞日明
春晝
彩女朝真天質秀
寶髻微偏

風卷霞衣皺
莫道東君情最厚
韶華半在東堂手

毛東堂

點絳脣

一朶千金帝城穀
雨初晴後粉施香透
雅稱尋芳首

把酒題詩遐想歡
如舊花知否
故人清瘦常憶同攜手

李銍

全芳備祖前集卷二

欽定四庫全書

子部

全芳備祖前集卷

三五

詳校官中書

臣竇汝翼

主事臣祁韻士覆勘

總校官庶吉士臣朱鈐

校對官助教臣卜維吉

謄錄監生臣繆濂

欽定四庫全書

金芳備祖前集卷三

宋 陳景沂 撰

花部

芍藥

事實祖

碎錄

黑牽衣芍藥也

廣雅

牛亨問曰將離贈之以芍藥者何

答曰芍藥一名將離故將別以送之亦猶相招名賜以

薜蘿薜蘿一名當歸

本草注

贈之以芍藥

詩經秦蒱

芍

藥主和五臟辟毒氣故合之于茵桂五味以助諸食因

呼五味和為芍藥爾

子虛賦注

論花者以芍藥為近侍

揚誠齋

紀要

芍藥之義見毛鄭詩百花之中其名最古謝公直中書省詩云紅藥當階翻自後詞臣引為故事白少傅知制誥有草詞畢詠芍藥詩詞采甚為該備然自天后以來

牡丹始盛而芍藥之艷衰矣考其實牡丹初號木芍藥

蓋本同而末異也

王元之詩譜

凡花名天下者洛陽牡

丹廣陵芍藥爾紅葉而黃腰號金帶圍而無種有時而出則城中當有宰相韓魏公守廣陵日一出四枝公嘗選客具樂以賞之是時王岐公以高科為倖王安石以名士為屬皆在選尚缺其一而莫有當者數日不決而花已盛公命戒客而私自念今日有客不問何如即使當之及暮南水門陳太傅來乃秀公也明日酒半折花

歌以挿之其後四公皆為相

后山叢話

四枝正紫重跗

累萼中有金蕊疏之號腰金紫

東軒筆錄

東坡云揚州

芍藥為天下冠蔡繁卿為守始作萬花會用花千餘萬
枝既殘諸園吏竝緣為奸民大病之今始至問民疾苦
以此為首遂罷之萬花本洛陽故事亦必為民害也會
當有罷之者錢惟演為留守始置遞貢洛花識者鄙之

曰此宮妾愛君之意也

漁隱叢話

雜著

揚州芍藥名于天下與洛陽牡丹俱貴于時四方之人
盡皆齎攜金帛市種以歸者多矣吾見其一歲而小變
三年而大變卒與常花無異由此芍藥之美益專推美
揚州焉大抵粗者先開佳者後發高至尺餘廣至盈手
其色以黃為最貴所謂緋紅千葉乃其下者鄭詩引芍
藥以明土風說者曰香草也司馬長卿子虛賦曰芍藥
之和具而後御之說者曰芍藥主和五臟又辟毒氣也
謝省中詩曰紅藥當階翻說者曰草色紅者也其義皆

與今所謂芍藥者合但未有專言揚州者唐之詩人最
以模寫風物自喜如盧仝杜牧張祜之徒皆居揚日久亦
未有一語及之是花品未有若今日之盛也余官于揚
學講習之暇常裁而定之蓋可紀者三十有三種乃具
列其名從而釋之

孔常父序

東武舊俗每歲四月大會

于南禪資福兩寺芍藥供佛而今歲最盛凡七十餘朵
皆重跗累萼繁麗豐碩中有白花正圓如覆盂其下十
餘葉承之如盤姿格獨出于七十朵之上因易名曰玉

盤盂

東坡詩序

天地之功至大而神非人力所能竊勝

惟聖人爲能體法其神以成天地之化其功益出其下而曾不少弛其力不然天地固亦有間而可窮其用矣余嘗論天地之物悉受天地之氣以生其小大短長辛酸甘苦與夫顏色之異計非人力之可容致功于其間也今洛陽之牡丹維揚之芍藥受天地之氣以生而小大深淺一隨人力之工拙而移其天地所生之性故竒容異色間出于人間以人而盜天地之工而成之良可

怪也然而天地之間事物紛紜出乎其前不得而曉者此其一也洛陽風土之詳已見于歐陽公之記此不復論維揚大抵土壤細膩於草木為宜禹貢曰厥草維天是也居人以治花相尚方九月十月時悉出其根滌以甘泉然後剝削老硬病腐之處揉調沙糞以培之易其故土凡花大約三年或二年一分不分則舊根老破而侵蝕新芽故花不成就分之數則小而不艷不分與分之太數皆花之病也花顏色之深淺與葉蕊之繁盛皆

出培壅剝削之力花既萎落亟剪去其子屈盤枝條使
不離散脉理不上行而皆歸于根明年新花繁而色潤
雜花根窠多不能致遠惟芍藥及時取根盡取本土貯
以竹席之器雖數千里之遠一人可負數百本而不勞
至于他州則壅以沙糞雖不及維揚之盛而顏色亦非
他州所有者比也亦有踰年即變而不成者此係土地
之宜而人力之至不至也花品舊傳龍興寺山子羅漢
觀音彌陀之四院冠于此州其後民間稍稍厚賂以丐

其本培壅灌溉遂過于龍興之四院今則有朱氏之園
最為冠絕南北二園所種凡十五六萬株意其自古種
花之盛未之有也朱氏當其花之盛開飾亭宇以待來
游者逾月不絕而朱氏未嘗厭也揚之人與西洛不異
無貴賤皆喜戴花故開明橋之間方春之月拂旦有花
市焉州宅後有芍藥廳在都廳之後聚一州絕品于其
中不下龍興朱氏之盛往歲郡將左移新守未至監護
不密悉為人盜去易以凡品自是芍藥廳徒有其名耳

今芍藥有三十四品舊譜只取三十一種如緋單

葉白單葉紅單葉不入名品之內其花皆六出維

揚之人甚賤之余自熙寧八年季冬守官江都所

見與夫所聞莫不詳熟又得八品焉非平日三十

一品之比皆世之所難得今悉列于左舊譜三十

一品分上中下七等此前人所定今更不易新收

八品御衣黃

黃色淺而葉疎如黃樓子

黃樓子

五十層間以金綫

袁黃

冠子

如警子

峽石黃冠子

如金錢子

鮑黃冠子

色類鵝黃

揚

花冠子

心黃葉紅間以金綫

胡纈

紅色深淺相雜

黽池

紅並萼或三頭○王觀

揚州譜序

或謂有唐若張祜杜牧盧仝崔涯章孝標李

嶸王播皆一時名士而專工于詩者也或游觀于

此不為不久而無一言一句以及芍藥意其古未

有之始盛于今未為通論也海棠之盛莫盛于西蜀

而杜子美詩名久重于張祜諸公在蜀日久其詩數

千篇未嘗及海棠張祜輩詩之不及芍藥不足疑也

王觀後論

天下名花洛陽牡丹廣陵芍藥為相侔埒禹貢

記揚州草木夭喬聖人之言然未見其夭且喬也廣陵
芍藥有自他方移來種之者經歲則盛至有十倍其初
而勝廣陵所出遠甚地氣所宜信其為天乎然則醫書
本草所載雖小物方土所出山川原野氣力不同或相
倍蓰十倍如此花矣不可不察也然芍藥之盛環廣陵
四五十里之間為然外是則薄劣不及洛陽牡丹由人
力接種故歲歲變更日新而芍藥自以種傳獨得于天
然非剪剔灌溉以時亦不能全盛又有風雨寒暄氣節

不齊故其名花絕品有至十四五年得一見者其間開不能成或變為他品此天地尤物不與凡品同特其地利人力天時參併其美然後一出意其造物亦自珍惜之耳芍藥始開時可留七八日自廣陵至姑蘓北入射陽東至通州海上西至滁和州數百里則人人厭觀矣廣陵至京師千五百里駿馬疾走可六七日至上不以耳目之玩勤遠人而富商大賈逐利纖嗇不顧又無好事有力者招致之故芍藥不得至京師而洛陽牡丹

獨擅其名其移根北方者本年以往則不及初年自是
歲加劣矣故北方之見芍藥者皆其下者也然種芍藥
為生者猶得厚價重利熙寧六年放罷海陵至廣陵時
正四月花時會友人傳欽之孫莘老偕行相與歷覽人
家園圃及佛舍所種凡三萬餘株芍藥嫩好及雖好而
不至者盡具矣扶風馬珣府大尹給事公子也博物好
奇為予道芍藥本末及與廣陵人所第名品示予予按
唐氏藩鎮之盛揚府號為第一萬商千賈珍貨之所叢

集百氏小說尚多說之而莫有言芍藥之美者非天地生物之劣于古而特隆于今也殆亦時所好尚不齊而古人未必能知正色耳自樂天詩言牡丹取叢大花繁者為佳是最洛中所卑下者古人之不知芍藥何疑然當時無記錄故後世莫知其詳今此後無傳說使後勝今猶不足恨或人情好尚更變駸駸日久則名花奇品遂將泯然無傳來者莫知有此不亦惜哉故因次序為譜三十一種皆使畫工圖寫以示未嘗見者使知之其

嘗見者因以吾言為信矣

劉貢父傳譜序

冠羣芳

大旋心冠
子深紅

寶粧成

髻子
色紫

賽羣芳

小旋心
冠子

晚粧新

白禰
子

畫天工

青心紅
冠子

疊香英

紫樓
子

點粧紅

紅禰
子

醉西施

大軟條冠
子淡紅

積嬌紅

紅樓
子

掬香瓊

素心玉
版冠子

道粧成

黃樓
子

淺粧勻

粉紅
冠子

素粧殘

初開粉紅
即漸白

縷金囊

金線
冠子

試梅粧

白冠子

擬香英

紫窠相冠子

醉嬌紅

深紅冠子

妬鵝黃

黃絲頭

怨春江

硬條冠子

試濃粧

綠多葉

妬嬌紅

紅窠相冠子

取次粧

淡紅多葉

蘸金香

金葉紫草葉

簇紅絲

紅綠頭

宿粧殷

紫高多葉

會三英

三頭聚萼

聚香絲

紫絲頭

效殷粧

小矮多葉

合歡芳

雙頭並蒂

擬繡韉

鞍子兩邊垂下

銀合稜銀

賦詠祖

五言散句

紅藥當階翻

謝元暉

傍砌看紅藥

杜甫

夾砌紅藥闌

白樂天

凝脂新賜浴半面更啼紅

陳傳良

壓架茶蘼老翻堦芍藥遲

戴石屏

七言散句

翠莖紅葉天付與此恩不屬黃鍾家

韓文公

共驚春去已多日爭看花開最後番

陳頴公

丹砂纈妙深難染白玉冠巍瑩絕瑕

韓魏公

紅玉斲成樓窰兀白雲爭簇髻巍峩

嬌紅鬧密輕多葉醉粉欹斜奈軟條

粉粧瑞玉千層密冠纓真金半尺圍

會忝掖垣真舊物多情應詔紫微郎

王元之

曾與掖垣留故事又來淮海伴詞臣

始知隋苑多佳麗未覺吳宮久寂寥

劉原父

吉祥寺下萬千枝看盡將開欲落時

蔡君謨

今朝關外尋蘭若忽見孤芳欲斷魂

香于蘭藥偏饒艷畫入縑緗未逼真

誰把金刀收絕艷醉紅深淺上釵梁

獨步東風醉西子止緣無語却相宜

陳無已

一枝賸欲簪雙髻未有人間第一人

小碧闌干四月天露紅烟紫不勝妍

曾南豐

消外謔歸情曠蕩省中番直勢拘攣

西掖階前辭御傘瓊林殿後媚春衣

張芸叟

油壁車中同載女菱花鏡裏並粧人

穆伯長

自洗銅瓶揷歌側要令書卷識奢華

趙紫芝

玉龍十二蓬山頂窰髻三千漢殿中

陳傳良

半粧宮面迎風笑間色仙衣帶露收

密葉自成金罽飾亂英誰輯紫茸香

不濃不淡勻脂粉半醉半醒媚雨風

楊東山

過眼一春春又夏開殘芍藥更無花

五言古詩

凡卉與時謝妍華麗茲辰歌紅醉濃露窈窕留餘春孤
賞白日暮暄風動搖頻夜窓靄芳氣幽卧如相親碌碌

漆洧贈悠悠南國人

柳宗元

今日忽不樂折盡園中花園中亦何有芍藥繞殘葩久
旱後遭雨紛披亂泥沙不折亦安有折去亦何嗟棄擲
諒未定送與謫仙家還將一枝春挿向兩鬢下

東坡

何以築花宅筆直松樹子何以蓋花房雪白清江紙紙
將碧油透松竹畫棟峙鋪紙便成瓦瓦色水晶似金鴨
煖未煖銀竹響無水汗容漬不溫晴態嬌非醉盡收香
世界關作間天地風日幾曾來蜂蝶獨得至勸春入宅
莫歸休勸花住宅且少留昨日花開開一半今日花
飛飛數片留花不住春竟歸不如折插瓶中看

秀

楊廷

艷艷錦不如天天桃未可晴霞畏欲散晚香愁將墮結

根本為誰賞心期在我元

稹

月蛾雙雙下楚艷枝枝浮洞裏逢故人綽約青霄游

孟郊

有名見鄭風今賞異疇昔采花當采根可能治民疾

宋景文

斜月正當樓香霧壓城重起傍小闌行花亦方在夢

李泰伯

花蓓大如拳花面或徑尺紫者棲紫鸞黃者浴黃鵠或
似扶桑枝推上一輪赤或似玻璃盆稍久擎無力又有

似平叔愛矜素粉白又有似蜀人喜染天水碧或似包
綠錦未放丹砂折或似浴青囊未放沉麝發應須和露
剪莫使見日色廣陵精神全免笑花無骨

謝堯仁

五言絕句

芍藥誰為壻人人不敢來惟應見詩老日日殷勤開

孟郊

醉紅如墮珥奈此惱人香正爾無言笑未應吳國亡

山谷

千葉揚州種春深霸衆芳無言誚君子窈窕有溫香

王梅

溪

已過花王候，纔聞近侍香。來遊禁酒地，免作退之狂。

五言排律

罷草紫泥詔，起吟紅藥詩。詞頭封送後，花口拆開時。對
坐鉤簾久，行觀步履遲。兩三叢爛熳，十二葉參差。背日
房微歛，當堦朶旋欹。釵莖抽碧股，粉藥撲黃絲。絲動盪情
無限，低斜力不支。周圍看未足，比論語難為。勾漏丹砂
裏，焦僥火焰旗。彤雲賸根蒂，絳幘欠纓綏。況有輕風動，
仍兼宿露垂。疑香熏罨畫，似淚著胭脂。有意留連我，無

言怨思誰應愁明日落如恨隔年期
菡萏泥連夢玫瑰
刺繞枝等量無勝者惟眼與心知
白樂天

五言律詩散聯

仙禁生紅藥微芳不自持
幸因清絕地還遇艷陽時
張齡

朱李應雙結蘭缸忽並然
異瓜綰帶合嘉木翠枝駢
夏英公

溱洧洵訏樂維揚厥草天傳聞多失實
看盡謾無聊婉

晚春陽謝中開道路遙誰移化工巧忽是物華饒跼萼
晴相照芳春暖並飄波翻蜀江錦霞萃赤城標

劉原父

七言古詩

今日堦前紅芍藥幾花欲老幾花新開時不欲比色相
落後始知如幻身空門此去無多地欲把殘花問上人

白居易

微雨濕清曉老夫門未開煌煌五仙子並擁翠蕤來胭
脂洗盡不自惜為雨歸來更無力老夫五十尚兒痴憑

軒一賦會真詩

陳去非

廣陵芍藥真奇美名與洛花相上下洛花年老品格卑
所在隨人趨高價接頭差處騁新妍輕去本根無顧藉
不論姚花與魏花只供俗眼陪妖姍廣陵之花品絕高
得地不移歸造化旋心弱體不勝枝寶髻欹斜猶墜馬

韓忠獻

芍藥殿春春幾許簾幙風輕飛絮舞昨宵酒醉玉樓春

一聲畫角吹殘雨

趙信

七言絕句

浩態狂香昔未逢
紅燈檠檠綠盤龍
覺來獨對忽驚恐

身在仙宮第幾重

韓文公

芍藥花開出曲欄
春衫掩淚再來看
玉人不在花長在

更勝青松守歲寒

錢起

風雨無情落牡丹
翻階紅藥滿朱欄
明皇幸蜀楊妃死

總有嬪嬙不喜看

王元之

阿姨天上舞霓裳
姊妹庭前剪雪霜
要與牡丹為近侍

鉛華不待學梅粧

康節

含露仙姿近玉堂
翻階美態醉紅粧
對花未免須酣舞
到底昌黎是楚狂

一聲啼鴂盡樓東
魏紫姚黃掃地空
多謝化工憐寂寞
尚留芍藥殿春風

花不能言意已知
今君慵飲更無疑
但知白酒留佳客
直待瓊舟覆玉巵

春風欲盡無尋處
盡向西園芍藥中
過盡此花真盡也

此身應與此花同

潁濱

春來便有南園約過盡春風約尚賒綠葉成陰花結子
便須携客到君家

春風十里珠簾捲彷彿三生杜牧之紅藥梢頭初繭栗

揚州風物鬢成絲

山谷

倚竹佳人翠袖長天寒猶著薄衣裳揚州近日紅千葉

自恃風流時樣粧

東坡

九十春光次第分天憐猶得殿殘春一枝剩欲簪雙髻

未有人間第一人

一年春事雨聲裏十里揚州夢想邊
眼底花明煩折贈

君家風物自嫣然

張南軒

與春相識亦多年今歲春胡不到園
一任堦前無芍藥

免教蜂蝶兩爭喧

鄭雪林

七言八句

雜花狼藉占春餘芍藥開時掃地無
兩朵粧成寶瓔珞
一枝爭看玉盤盂
佳名會作新翻曲
絕品難尋舊畫圖

從此定知年穀熟姑山親見雪肌膚

東坡

紅紅白白定誰先
嫋嫋娉娉各自妍
最是倚欄嬌分外
却緣經雨意醒然
晚春早夏渾無伴
暖艷清香政可憐

好為花王作花相
不應只遣侍甘泉

楊廷秀

旁招近侍自江都
兩歲何曾見國姝
看盡滿欄紅芍藥
只消一朶玉盤盂
水晶淡白非真色
珠箔空明得似無

欲比比花無可比
且云冰骨玉肌膚

楊廷秀

又是揚州芍藥時
花應笑我賦歸遲
滿堂留得春如畫

對酒何妨鬢似絲玉立黃塵那可到錦圍紅蠟最相宜

買山若就當移種此際誰能杖履隨

賈似道

溫溫玉立綠陰中不犯芳菲逐萬紅折盡長淮多暇日

簪聯四座足春風應如慶歷梅花瑞况有昌黎屬句工

問得君王乞身去移根栽傍曲欄東

似道

上了甘泉三捷書長淮萬里一塵無清和時節如春在

紅藥精神與昔殊叢玉生香歌可譜圓金有客瑞重圖

公堂且盡今朝醉已問君王乞鑑湖

似道

七言律詩散聯

酒酣誰欲張珠網金鈿偏宜問寶冠
露裏更添雲髻重

蝶樓長苦玉樓寒

韓忠獻

感傷綸閣多情客珍重維揚好事僧
酌處酒盃深蘸甲

折來花朵細含稜

王元之

蠶老桑柔戴勝鳴翻堦紅藥占東榮
舞風孫壽愁眉破

帶雨驪姬淚眼盈

洪駒父

樂府祖

望海潮

人間花老天涯春去揚州別是風光紅藥萬枝佳名千
種天然浩態狂香尊貴御衣黃未便教西洛獨占花王
困倚東風漢宮誰敢鬪新粧年年高會維揚看家誇
絕艷人詫奇芳結藥當屏聯葩就幄紅遮綠遶華堂花
面暎交相更秉蘭漆消幽思難忘罷酒風亭夢魂驚恐

在仙鄉

晁无
咎

賀新郎

一夢揚州事畫堂深金瓶萬朶元戎高會座上祥雲層
臺起不減洛中姚魏歎別後關山迢遞國色天香何處
在想東風猶憶狂書記驚歲月一彈指數枝清曉頗
馳騎向小窗依稀重見蕪城妖麗料得花憐儂消瘦儂
亦憐花憔悴謾悵望竹西歌吹老矣應無騎鶴日但春
衫點點當時淚那更有舊情味

劉後村

蝶戀花

日借輕黃珠綴露困倚東風無限嬌春處看盡嬌紅渾

漫與淡粧偏稱泥金縷 不共鉛黃爭勝負
殿後開時 故欲尋春去一似朝霞無定所
那堪更着催花雨

陳兆湖

沁園春

把酒問花繭栗稍頭春今幾何
笑身居近侍翻階萬玉面勻菩薩髻
擁千螺一一牙籤英英碧字占定花開甲
乙科歸來也倚紫微吟處謠作陽和
祇今花事無多看幾許風烟付與他
待園將翡翠怕蜂粘粉織成雲錦
遣鳳銜梭誰剪并刀贈之燕玉
莫負雙娥嬌溜波花應

道儘花強人面底用能歌

秋經

江神子

窗綃深掩護芳塵翠眉顰越精神幾雨幾晴做得這
些春切莫近前輕着語題品錯怕渠嗔碧壺誰貯玉

粼粼醉香茵晚風頻吹得酒痕如洗一番新只恨謫仙
渾懶却辜負那倚闌人

秋經

踏莎行

洛下根株江南栽種天香國色千金重花邊三閣建康

春風前十里揚州夢 油壁輕車青絲短韉看花日日

催賓從而今何許定王城一枝且為鄰翁送

張于湖

浪淘沙

鷓鴣恐花殘誰道春闌多情紅藥待君看濃淡曉粧新
意態獨占西園 風葉萬枝繁猶記平山五雲樓映玉
成盤二十四橋明月下誰凭朱闌

韓南澗

驀山溪

熏風時候芍藥披晴晝天上玉闌干展一枰天家錦繡

漢宮唐殿嬪御逞妖嬈飛燕女太真妃一樣新粧就

黃金撚線色與紅芳鬪誰把絳綃衣誤將他胭脂清透

晚風生處襟袖捲濃香持玉笋秉紗籠倚醉聽更漏

陳濟濱

醉蓬萊

訪鶯花陳迹姚魏遺風綠陰成幄尚有餘香付寶階紅

藥淮海維揚物華天產未覺輸京洛時世新粧施朱傅

粉依然相若東素腰纖捻紅唇小郭袖嬌看倚闌柔

弱玉珮瓊琚勸王孫行樂況是韶華為伊挽駐未放離

情薄顧盼階前留連醉裏莫教零落

劉圻父

水龍吟

杜鵑啼老春紅翠陰滿眼愁無奈飛來何處鳳駟驚駭

霞裾雲佩風檻嬌凭露梢慵鞦酒痕微退念洛陽人去

香魂又返依然是風流在十年一覺揚州春夢離愁

似海浩態難留粉香吹散幾時重會向樽前笑折一枝

紅玉帽簷斜戴

盧蒲江

念奴嬌

人生行樂筭一春歡賞都來幾日綠暗紅稀春色去贏
得星星鬢白醉裏狂歌花前起舞拚罰金盃百淋漓宮
錦忍辜妖艷姿色 須信殿得韶光只愁花謝又作經

年別嫩紫嬌紅還欲語應為主人留客月落烏啼酒闌
燭暗離緒傷吳越竹西歌吹不堪老去重憶曾離野

側犯

恨春易去甚春却向揚州住微雨正繭栗梢頭弄詩句
紅橋二十四纔是行雲處無語漸半脫宮衣笑相顧

金壺細葉千朶圍歌舞誰念我鬢成絲來此共樽俎後
日西園綠陰無數寂寞劉郎自修花譜

姜白石

全芳備祖前集卷三